

Jaorverslag 2011-2012

Ut jaor van Prins Eric d'n Urste mit zien prinses Maria, van Jeugdprins Rob d'n Twedde, Jeugdvorstin Sofie en Jeugdprins Dorien. Ut jaor van ut nie roetsje en schuuve, ut jaor van de kilo's kèl-snuupkes en 's mèrges wèrme mellek mit honing um de stem tot dinsdags ien iere te hâlde, ut jaor van de verkierde mantel, ut jaor van de Spurriemökketwitter mit de dubbele persoonlikhede van Prins Eric en Vorst Emiel, ut jaor van de typetjes, en natuurluk wer ut jaor van enne fantastisch mojje vastelaovend ien Oeldere.

Ut bestuur bestoond uut:

- Vurzitter Hans Loonen
- Vorst Emiel Evers
- Penningmèster Robert Steeghs
- Sik Eric Flinsenbergh, en latter interim-sik Rob Kunkeler
- En de bestuursleje Rob Pluk, Martijn Drabbels en Jos Willems

De Raod van Elluf bestoond dit jaor uut:

Erwin Steeghs, Stef Claessens, Jop Loonen, Tom Loonen, Pascal Classens, Freek Smulders, Vincent Verstappen, Bart Jenneskens, Willem Arts en John Voermans.

We begosse ut seizoen natuurluk wer mit **d'n 11^e van d'n 11^e**, mar dit jaor kwaam d'r nog en 11 bej. Dit make wej allemol warschienlik mar 1^e kier mit, en ut viel ok nog op enne vrejdag. Extra reje vur en fiëst natuurluk. We han dr mit de raod en ut bestuur zellefs en extra commissie vur opgericht. Of dat zu veul wil zegge wiët ik nie aangezien commissie 11-11-11 commissie nummer 23 was bej de veriëning.

Mar efkes terug naor **11-11-11**:

Dit jaor was d'r en sort wedstrijd tusse de verschillende buurte, net zoëas dat vroeger altied mit de boerebrulleft ging.

Mar urst wier net zoeës vurrig jaor d'n mök iengezègend, alliën dit jaor wier dat buute gedaon.

Toen iederiën wer binne en en bitje opgewèrmd was, begos d'r enne kwis, en iedere buurt mos zien bèst doen zu veul meugelek punte te haale. Toen de punte bej-en geteld waare kwaam de buurt Oeldere West as winnaar uut de bus. Zej wonne enne mojje 11-11-11 wisselbeker, en as ik goed tel hoeft den dus pas over 100 jaor wer gewisseld te werre.

Ok de muziekveriëning kwaam nog efkes hun gezicht laote zien, en ok nog en moj stukske speule. Ut was enne gezellige en goed bezochte aovend.

Veul tied um uut te ruste was d'r nie, **want den 12^e, den dag dernao**, ginge we alwer mit de Prins, Prinses, Vorst, bestuur en raod, en alle vrollie naor ut Vorsteraodsbal. Dit jaor wier dat gehalde ien ut jubilerende Luëne. Aangezien we tiggeworrig 14 vorste ien de gemènt hebbe die allemol 7 minuute meuge praote was ut enne lange zit. Dat was ok wel te merke.

Ozze eige vorst Emiel moog as allerlèste, en hoewel hej wer en biëstig goei verhaal haaj, was der vur en antal meense mier andacht vur neje pilskes as vur zien verhaal. Toch zien wej der wer trots op hoe ozze vorst os dörp het vertegenwoordigd den aovend.

Nao ut praotgediëlte kwaam, hoe kan ut ok anders ien Luëne, ut Puppies Huisorkest de aovend verder muzikaal opluustere. Ut was enne mojje aovend, mit an ut end nog en aantal gratis pilskes.

18 November, de vreedag dernao. We ginge mit en klène delegatie wer naor Luëne vur de jubileumreceptie. We hebbe en moj cadeau gegève, en ok mar gelijk efkes die gratis pilskes afgerèkend, want wegrenne mit en blad bier viel warschienlik toch nie onder 'gratis'. Dornao was ut fiëst mit de band 'Lijn 7', en hebbe we os toch mar wer moj vermakt.

25 En 26 november ware de Bonte Aovende.

Ut was wer twië aovende gezellig druk, en wer en goed programma.

Emiel haaj dizze kier enne hiële korte ienleiding, want volleges hoofd Bonte Aovend Commissie Vincent, haaj d'n urste buutereedner mar wennig tied. Dit klopte alliën nie gâns, en dat het Vincent ok gewiëte. De urste vief minuute van ziene buut vreedags het Dick Advocaat efkes an iederiën duudelik gemakt wat hej vond van Vincent en zien hiële hebbe en houwe. Mar goed, wej zitte d'r ok um te lache en wej vonde ut wel grappig.

Dornao kwaam ut olympisch team van Oeldere efkes laote zien wat ze kosse. Soms ging ut zu snel dat ut mar goed was dat ut ok ien slowmatie te zien was. Mark, Joep, Niek, Thijs, Giel, Roel, Danny, Mike, Fred en Martien, moj gedaon.

Vervolges wer en neje uutzending van Radio Oeldere 11 FM. DJ Ruud, DJ Frank en ok af en toe DJ Freek han ut der wer aover wat d'r allemol gebeurd was ien Oeldere, en ut huusorkest mit Thei, Math, Piet, Jenny en Susan was d'r ok wer bej. DJ Wout was d'r dit jaor nie bej, mar het wel mitgehollpe an de uutzending ien mekaar zette. Moj gedaon Oeldere 11 FM.

Dornao kwaam de APK op as en stel gespierde kèls die uut de klier ginge. Hoewel ik zeker mènde dat ze pakke an han hebbe ze os wies gemakt dat dat gewoën hun eige lichaam was. Ik wiët nie of hun vrollie ut daar ok mit èns zien, mar wat we allemol kunne be-ame is dat Ron, Ton, Pieter, Pieter, Jos en Jos d'r en moj stuk van gemakt hebbe.

Dornao kwaam enne vuilnisman den zellef mier zooi miek as dat hej opruumde.

Dornao kwame Marco en Peter wer mit en moj stuk, as Anton en Anton die ien november naor de oktoëberfiëste ware gewist, of ien oktoëber naor de novemberfiëste, ik wis ut nie mer krek. Ze han daar enne mojje tied gehad, en wej hebbe ok gèr naor hun verhaale daarover geluusterd.

Toen was ut wer tied vur d'n afsluuter, dit jaor Striepke Veur. Den iëne ging witte mar dan zwart terwiel zien vrouw nie wis wat hej witte en den andere wis nie mer of hej nou zwart of wit witte en dat hej ut zellef witte, of zoë iets. Wej witte ien ieder geval dat we gelache hebbe.

Daornao was d'r dankzej Martien en Jessy hun cadeaus 's zaoterdays en knallende finale mit confettikanonne, en ok de Liende was hiël blie dat die saaie vloer nou eindelijk es en leuk kleurke kreeg.

Zondag 27 december ginge we mit en delegatie vrejwillig naor Cássele, umdat die ok en jubileumreceptie han, en zoëas ik begrepe heb was dat ok ut spannendste wat d'r ovver verteld kos werre.

Toen ien december verscheen d'r ienèns en vacature ien 't Krèntje van VVDS. Niemes wis eigelik waor dat vur stoond, alliën ien ut twedde bericht wier ut al ietskes mier duudelik.

Gelukkig begos op en gegève moment VVDS, oftewel Vastelaoves Veriëning De Spurriemök wer berichte ien ut Oelders ien ut Krèntje te platse en was ut wel vort duudelik dat ut um de neje prins ging. Ut prins raoje op posters wier ok vervange dur en mailadres, en de mèst geraojde persoëne kwame dan op en groët bord op ut neje durps/gras/plein te hange.

Zondag 8 jannewarie was ut dan zowiet, Vorst Emiel zien verjurdag. Oh jao en der was ok nog de prinseproclamasie.

We begosse natuurluk ien d'n Terp, wor Prins Martien en Prinses Jessy wer gewoën Martien en Jessy wiere, mar nie vurdat zuwel de 3 lèste ex-prinse en zejzellef nog enne kier hun liedje vurgedrage han. En gelukkig moog ok Martien wer bej de APK.

Dornao naor de Liende, en toen ut precies ongevèr ietskes nao 11 ovver 3 was, begos ut prins uitkomme. Dit jaor wier dat hiël moj gedaon durmiddel van en toniëlstuk. Bruul woj iederiën zu snel meugelik zien kroeg uutwerke um naor de Liende te gaon, mar dat lukte steeds mar nie. Gelukkig was hej net op tied vur ut uitkomme van de neje prins. Vorst Emiel laas de 11 regels op, en toen kwaam dwars dur ut doek Prins Eric mit zien Prinses Maria.

Ien Eric ziene urste speech as prins feliciterde hej Emiel ok nog efkes uutgebred.

Dornao was ut tied vur ut jeugdtrio. We kregge allemol hints, en de kiender mosse raoje hoe dat op ozze neje jeugdprins of –prinses sloeg. As ge aachteraf kiekt haaj iederiën ut natuurluk wel kunne werre, mit die hints die ze kregge.

Mar vervolleges gelukkig de 11 regels, en daor kwaame Jeugdprins Rob, Jeugdvorstin Sofie en Jeugdprins Dorien op de buhne. Naodat ze allemaol hunne speech vur han gedrage ginge ze allemaol op de nek, en ien enne groëte polonaise.

's Aoves nog ekkes naor de soos, dornao eier ète bej Eric en Maria, en toen nog ekkes naor den Terp.

Zaoterdag 21 jannewarie was ut Ald Wieverbal. Eigelik heb ik nou al genoeg gezeet hieraover. Want de naam âld wieverbal stut gewoën altied vur gezelligheid, pilskes, wientjes, en enkele cola light vur bejvurbeeld ut alter-ego van Twitter-prins Eric **[KLIK]**, en goeie bend, ien dit geval natuurluk de Rosenthaler, zaagsel, ow allermojste pekske an, mier as genoeg ète, nog mier drank, en vur veul meense 's merges en bitje pien ien de kop. Ut was wer en geweldig moj fiëst, en of ge der nou wel of nie wart, zurreg dat ge der volgend jaor wer bej ziet!

PS: Mèst gemakte grap van dèn aovend: Wurrum zien de vrollie van de raod nie verklèd?

Zaoterdag 28 jannewarie is en delegatie van de raad same mit de Prins, Prinses en Vorst naor Aostrum gewist. Zoëas we wel dukker mitmake, mosse we daor ok zellef ut fiëst an de geng hellepe. Ut wier hoe langer hoe gezelliger, en hoewel gillie dat natuurlik nie van os gewend zien, ging ut ok steeds en klèn bietje lomper. Ut schilt dat wej wel tigge en stoëtje kunne. Ut wier pas en probleem toen en paar Aostrumse vrollie mènde dat ze daor net zu goed tege kosse as die Schwarzeneggers van de Oelderse raad. Iën of ander vrouwke het dat motte bekoëpe mit enne gebroke biën of iets dergeliks. En hoewel wej daor niks an kosse doen en ut ur eige schuld was, hebbe Prins Eric en Vorst Emiel ur toch ekkes naor buute toe gedrage en mit gewaacht tot ze afgevoerd wier. Mar ondanks dat alles was ut toch enne gezelligen aovend.

Zondag 29 jannewarie was den Jeugd Bonte Middag. Gepresentierd dur Dennis Clôsses kwaam der en hiël scala an optrejes vurbej:

Van dansjes tot liedjes, gitaar, mime, zellefs sport kwaam vurbej, enne moppetrommel, ennen echte buut, drums, en blacklightshow, en tot slot nog de dubbelgangers van de Stappers. Ien totaal hebbe mier as 90 kiender mitgedaon an dizze middag, georganizierd dur en delegatie van de Bonte Aovend Commissie, mar ok vurral mede dur Fabian, Liset en Silvia, hiël moj gedaon, en allemol bedankt daorvur.

Vrejdag 3 fibbrewarie was ut tied vur ut ontbijtje bej de winnaar van de prinsepoll. Dit jaor wier ut ontbijt gehalde um 8 uur 'saoves mit bittergarnituur en en pilske, ien huize Marco en Angelique. Zoë kan ut natuurlik ok.

Zaoterdag 4 fibbrewarie was Krantverkoëp. Iën van de fijnste daag uut ut lève van het hoofd van de krantecommissie, vurral as den dag vurbej is. Ok dit jaor zien wer koste noch moeite gespaard um wer enne mojje krant vur Oeldere te maake. Dit jaor ok nej ien de krant: Zuuk de twië verschille tusse pagina 45 en 83! As ge ut wet lever ow antwoord ien drievoud ien en mak kâns op de pagina den eigelik op nummer 83 haaj motte staon.

Mar ondanks dat kunne we wer trots op wat we wer vur mekaar gekrege hebbe.

Zaoterdag 4 fibbrewarie ginge we 's aoves ok nog naor Circus Mök. Op zich was ut bèst vermakelik, ware ut nie dat wej ut geluk han op de lèste zaoterdagaovend derhin te meuge. De maker van ut Venrods woordeboek wier gehuldigd. Ik zal ollie nie vervèle mit wat d'r toen allemaol ovver den kel verteld is, mar bekant en uur latter han we de huldiging gehad en ging ut programma verder. Gelukkig han we nao de vurstelling nog net genoeg tied um de knip leeg te make, en toen wer mit zien alle naor huus.

Daags dernao, op Zondag 5 fibbrewarie was wer de jaorlikse Prinsereceptie. De prins, prinses, Jeugdprins, Jeugdvorstin en Jeugdnarrin hebbe wer hiël veul hëndjes geschud, en natuurlik en hoëp kado's gekrege. Ik docht bej mejzellef: Ut is mar goed dat Maria tandartsassistente is, want die zulle allemaol wel gen tand mer aover hebbe as dat allemaol op is.

Natuurlik ware d'r ok wer en aantal groepe die speciaal iets iengestudierd han, en ok vereniginge, en de collega's en familie kwame wer allemaol nève.

Toen ut fiëst alwer begonne was, kwame ok nog efkes de vurzitter, secretaris en penningmèster van de vorsteraod binnegevalle.

Der wier in ut 'kort' verteld wat dees kels allemaol geprestierd han, en Prins Eric, Vorst Emiel en Vurzitter Hans Loone kreghe en mojje onderscheiding van de vorsteraod, ter iere van hun 11 jaorig lid bej en vereniging. Uiteraard kreghe Maria, Ankie en Monique nog enne mojje bos bloeme.

An ut end van den dag was Prins Eric dus en onderscheiding rieker, mar wel ennen scepter èrmer.

Woensdag 8 fibbrewarie was den JVV-Aovend.

Dizze aovend wier den scepter teruggegeve ien ruil vur en vat bier. Eric was hiël blie dat hej um terug haaj, want hej voond ut mar niks um zonder scepter roond te loëpe.

Mar verder mit de JVV, we han dit jaor en neje bend, namelijk de senioren-express. Dees wier mit name dur de aldere JVV-ers hiël goed gevonde. Ze mieke mojje muziek en makte tussendur ok nog ennen hoëp grappe. Genoeg vermaak dus, en Theo en Elly de Rijck dun ok nog en hiël moj stukske. De volksdansgroep was ok wer van de partij. Ut was enne gezelligen aovend.

Donderdag 16 fibbrewarie zien we wer naor de SJMO gewist, en den vrejdag dernao was ut wer tied vur de schôlcarnaval, mit de welbekende optocht vur de kiender en dornao en fiëst ien de Liende. Den optocht haaj dit jaor as thema: Sprèkwoorde, en daor kwaame èrg leuke en creatieve ideeje uut.

Vrejdag 's aoves, was ut traditionele ziekebezuuk. Dit jaor op bezuuk ien Luëne, bej Ger Flinsenberg, de vader van Prins Eric. Hej was geoperierd an zien knej, en was hierdur ok nie op de receptie gewist. Durrum kreeg ok den aovend den medaille uutgereikt.

Dornao zien ze ok nog ekkes naor Aostrum gewist, jaowel, naor ut vrouwke wat ur biën gebroke haaj. Ze haaj ut totaal nie verwaacht, mar kos ut bezuuk wel hiël èrg wardiere. Helaas vur ur het zej den hiële carnaval ien ut gips gezète.

En van vrejdag wier ut zaoterdag, en toen was ut zowiet, de vastelaovend was begonne. 's Merges zien we urst mit en aantal man naor ut Groëts Vastelaovesontbijt ien de soos gewist. Dit was nej dit jaor, mar wel èrg moj opgezet. Dornao verder mit ut klenste mökske, um tien vur 11. Dizze kier ware ut Ruud en Marjolein Joëste mit hunne Sem die ut goed getimed han.

's Middags was ut dan wer tied vur de sleutelaoverdracht op de gemènt, en wej zien blie dat ze nog steeds nie kunne telle daor, aangezien we mit wennig bonne alwèr veul gedronke han. En dan 's aoves um 7 uur zate we allemaol klaor ien de kerk. Ut was wer en mojje mis, en de jeugdfanfaar zurregde vur de muziek, en we han zellefs en nej misbuukske, mar dizze kier wel echt, mit kleur en zoë. Pastoer kreeg ok wer enne mojje medaille van de vereniging en vorst Emiel hield wer enne mojje speech. Hej haaj ut d'r aover dat wej mit os carnavalspekske an allemaol net iets mier durrefde dan anders. Ok gaaf hej os ut advies um dizze vastelaovend te doen wat we dochte dat we mosse doen. Ik wiët ok nie of hej dat haaj motte zegge. Enne bepaalde roëker docht namelijk 's maondagsaoves: Laot ik mien peuk es nie op de grond gooie, en es netjes bej Emiel ien ut gezicht uutmake, en den deuj dat ok. Toen haaj dor dènk wel efkes spiet van.

Mar goed, nao de kerk ekkes naor den Terp vlaai ète en vervolleges snel naor de Liende vur ut Mökkebal, dit jaor mit ut Thema Mutsebal. Dit jaor was de band Nightwind d'r vur de muziek. En die band was niks mis mit.

Ze mieke goeie muziek, en ok al voonde ut genne goeie muziek, dan han ien ieder geval de kels nog wat um naor te kieke. Jan kos zich nie mer ienhalde en noom de zangeres op de nek ien enne polonaise, en Jos Loone zurregde wel dat ze der aachter nie af zeuj valle. Den haaj alles ien de hand, zeg mar. Petra is nog gevraogd wat zej dor nou van voond, mar die hield urre poët stief.

En op op dizze aovend kregde Prins Eric, Vorst Emiel en Vurzitter Hans Loone nog en onderscheiding, namelijk de orde van de zilvere Spurriemök, uutgereikt dur John en Vincent, names de vereniging, vur het 11 jaor bej de Spurriemök zien, mit biezontere verdienste.

An ut eind van den aovend natuurlik wer eier ète, en as ge geluk had kregde zellefs en ei mit ham en kiës derbej. Ozze prins was toch nog nie tevreje, want hej luste genne kiës op zien ei.

Nao en klèn bietje slaope wier ut ok wer **carnavalszondag**.

Vur Eric en Maria begos den dag op tied, want hun kammeraöj kwame hun verrasse mit en ontbijtje. Net nao de middag wiere zej en de jeugdprins mit de carnavalswaage thuis opgehald, en dornao was ut tied vur den optocht. Ik heb mej laote vertelle dat ut vurrig jaor op dizzen aovend Maria ur eige idee was um den optocht vort op zondag te doen, dus ut is ok ur ège schuld dat den wage en bietje oondergesnejd is.

Nao den optocht was natuurlik de priesuutreiking, mit ansluutend de Voice of Oeldere. Hier kosse we ekkes kieke wat vur en zang- en danstalent de Oelderse jeugd het. Prins Eric is tussendur nog ekkes naor Blitterswiek gewist, naor zien pètekiend Prinses Nadieh. An ut end van de middag wer efkes naor de soos, en dornao naor den Terp. Dit jaor wer enne neje DJ ien de Terp, DJ Ruud.

Wat latter op d'n aovend hebbe en aantal meense nog fijn kunne touwtjespringe mit en stel an mekaar gemakte lichtstèfkes. Ge wurte toch creatief as ge nix bèters te doen het, laote we dan mar zegge.

Maondag 20 fibbrewarie was 's merges ut snotneuzebal. Wej zien mit de jong jonge van de raad dringend verzocht um toch mar es wat dukker op tied naor bed te gaon, aangezien der nie mer zu hiël veul snotneuze ien Oeldere bejkomme. Misschien dat we dan wel enne kier en raadslid-zuukt-vrouw motte doen ien Oeldere, want as ge alliën op tied naor bed gut schiet dat ok nie op natuurluk.

's Middags naor den optocht waor we alwer urste pries han ien de categorie Oelderse Prinsewaages.

Daornao naor de Liende, en dor stoond den bèste DJ van hiel Brabant en Limburg, mar wel van en jaor of 15 terug. De muziek den de jeugd kende kende hej nie, en andersum. Mar hoe dan ok hebbe we os goed vermakt.

Daornao wer ekkes naor de Soos, en toch wer ekkes naor den Terp, wer luustere naor enne DJ den WEL wis wie W-Dreej is. En wor ge, as ge ut mar lát zat hat gemakt, nog hat kunne geniete van en min of mier onvrijwillige striptease van iën van de Toppertjes van de Raod. Vurdiël daorvan is wel dat Rob Kunkeler alvast en raodslejekpak an het kunne passe.

Dinsdag 21 fibbrewarie

We begosse mit de jaorlikse brunch, al was den nou verplatst van zondag naor dinsdag. Daornao kwaam de mega fantastische buutegewoëne binnezitting! Ik zal ow ierlik zegge dat ik nie mer krek iederiën wiët den mitdeuj, mar wel dat der enne hoëp tusse zaate, waarvan iederiën ut nie verwaacht haaje. Mar dat is ut mojje an de BBZ, ge kunt alles verwaachte. Zellefs roze pakke waor ge pien van an de oëge krigt.

Ut was wer biëstig gezellig, alliën was ut wel en bitje jammer dat ut zo verekkes hèt was. Zo het dat der nao afloëp ennen hoëp meense buute stoonde te “roëke” die nog noëits en sigaret an han gerakt. Of zeuj ut an den ovverdatumse DJ hebbe gelège?

Ok was der wer ète verzurregd dur d’n Terp, namelijk brudjes hamburger en brudjes kank. Althans, zoë stound ut op ut programma. Gelukkig smieke die lèste gewoën naor knak.

Toen wier ut wer aovend en wier beej de jeugd de mök verbrand. Jeugdprins Rob dn Twedde, jeugdvorstin Sofie en jeugdarrin Dorien kunne terugkieke op en hiël moj seizoen.

En net vur middernaacht ien den Terp begos zoëas altied ut afsluute van de carnaval. Urst wiere Rob en Linda naor veur gehald. Uiteraard wier nog es opgesomd wat den allemaol gedaon het vur de spurriemök, en het vur dees verdienste de orde van de bronze Spurriemök gekrege, mit de bejbehuurende Oerkonde.

Dornao wiere dur Frank Steeghs names de Mök is Los Helmie Janssen en Piet Drabbels nog is ien ut zönneke gezet, vur de veule dinge die ze betèkend hebbe vur de joekskepel.

Daornao wiere Prins Eric en Prinses Maria naor veur gehald. Eric stopte nie alliën as prins, mar ok as sik bej de spurriemök. Ok zien carrière bej de Spurriemök wier nog es durgelicht, en hej moog nog iëne kier speeche. Toen dat allemaol gedaon was moge ze buute de mök an gun stèke, en was officieel de carnaval vurbej, mar ien den Terp ging ut fiëst nog lang dur.

Mit ut mantels ienlevere kwame ze der nog efkes achter dat Maria den ganse carnaval de mantel van de jeugdprins um het gehad, en andersum.

Ut seizoen 2011-2012 was ok wer en hiël moj fiëst, en we kunne alwer terugkieke op enne hiële mojje carnaval.